

四庫全書

史部

欽定四庫全書

明會典卷一百七十三

國子監

國初置國子學正四品衙門設博士助教學正學錄典
樂典書典膳等官後添設祭酒司業典簿改典膳為掌
饌洪武八年置中都國子學十五年改國子學為國子
監中都國子學為中都國子監從四品衙門職專教化
之事定設祭酒司業及監丞典簿博士助教學正學錄

掌饌等官二十六年革中都國子監永樂元年置國子
監於北京本監以累經車駕臨視監官不敢中廳而坐
中門出入兩京同

監規

洪武十五年定一本監正官每日侵晨升堂就坐各屬
官以次赴堂序立行揖禮正官坐受後各屬官分列東
西相向對揖禮畢就立俟各堂生員行列恭揖禮畢方
退晚亦如之一本監屬官每遇赴堂稟議事務質問經

史皆須拱立聽受取次講說不得即便坐列其正官亦不得要求虛譽輒自起身有紊禮制務在綱紀秩然足為矜式一本監正官職專總理一應事務須要整飭威儀嚴立規矩表率屬官模範後進不可尸位素餐因而怠惰一監丞之職所以叅領監事凡教官怠於師訓生員有戾規矩并課業不精廩膳不潔並從糾舉懲治務要夙夜盡公嚴行約束毋得徇情以致廢弛一博士助教學正學錄等官職專教誨務在嚴立課程用心講解

以臻成效如或怠惰不能自立以致生員有戾規矩者
舉覺到官各有責罰一生員在學讀書務要明體適用
以須仕進各宜遵承師訓循規蹈矩凡出入起居升堂
會饌毋得有犯學規違者痛治一掌饌職備廩食供給
師生須要恪恭乃事務在豐潔毋得通同膳夫厨役人
等因而剋減以致不充違者依律問罪一典簿職掌文
案凡一應學務并支銷錢糧季報課業文冊等項皆須
明白稽考毋得通同吏典人等侵損漏落作弊違者并

依律處治施行一每月背講書日期初一日假初二日
初三日會講初四日背書初五月初六日復講初七日
背書初八日會講初九日初十日背書十一日復講十
二日十三日背書十四日會講十五日假十六日十七
日背書十八日復講十九日二十日背書二十一日會
講二十二日二十三日背書二十四日復講二十五日
會講二十六日背書二十七日二十八日復講二十九
日背書三十日本年又定一學校之所禮義為先各堂

生員每日誦授書史並在師前立聽講解其有疑問必須跪聽毋得傲慢有乖禮法一在學生員當以孝悌忠信禮義廉恥為本必先隆師親友養成忠厚之心以為他日之用敢有毀辱師長及生事告訐者即係干名犯義有傷風化定將犯人杖一百發雲南地面充軍一開設太學教育諸生所以講學性理務在明體適用今後諸生止許本堂講明肄業專於為己日就月將毋得到於別堂往來相引議論他人長短因而交結為非違者

從繩愆廳糾察嚴加治罪一師生廩膳既設掌饌以專其職厨役人等以任其役升堂會饌已有成規今後不許再立監饌生員每日諸生會食務要赴會饌堂公同飲食毋得擅入厨房議論飲食美惡及鞭撻膳夫違者笞五十發回原籍親身當差一各堂教官每班選重厚勤敏生員一名以充齋長表率諸生每日各齋通輪齋長四名於彙倫堂直日整點禮儀序立班次及催督各齋工課不許仍設掌儀專總事務有妨本名肄業一堂

宇宿舍俱各整飭應用什物皆已備具務在常加潔淨
閑雜人等不許輒入其在學人員敢有毀污作踐者從
繩愆廳糾舉懲治一本監官員及官民生不許將帶家
人僮僕輒擅入學紛擾污雜違者從繩愆廳糾治一掌
饌職專供給飲食務在恪恭乃事毋得簡慢師生如有
病患不能行履者許令膳夫供送若無病不行隨衆會
食者不與當日飲食一除三飯之後並不許另外茶飯
及澡浴湯水敢有刁蹬索取者繩愆廳糾治仍將本名

附集愆冊紀錄之一監丞置立集愆冊一本各堂生員凡有不遵學規即便究治仍將所犯附寫丈冊以憑通考初犯紀錄再犯決竹篦五下三犯決竹篦十下四犯照依前例發遣安置一師生所用飯食物料一一備具在學並無缺少若掌管之官蹈前官典簿之弊不將官有見在物料放支却令差到市夫厨役人等日逐補辦油鹽醬醋等物今後新官典簿若有此弊許生員面奏一在學生員或千數之廣或七八百人以為中或百人

以為下體知有等無志之徒往往不行求師問道專務
結黨恃頑故言飲食污惡切詳此等之徒果係何人之
子其所造飲食千百人所用皆善獨爾以為不善果君
子歟小人歟是後必有此生事者具實奏聞令法司枷
鐐禁錮終身在學役使以供生徒十六年定一正官嚴
立學規六堂講誦課業定生員三等高下定六堂師範
高下一以二司業分為左右各提調三堂一博士五員
雖分五經共於彞倫堂西設座教訓六堂依本經考課

一凡生員通四書未通經者居正義崇志廣業堂一年半之上文理條暢者許升修道誠心堂坐堂一年半之上經史兼通文理俱優者升率性堂一生員坐堂各堂置立勘合文簿於上橫列生員姓名於下界畫作十方一月通作三十日坐堂一日印紅圈一箇如有事故用黑圈記每名須至坐堂圈七百之上方許升率性堂一生凡生員日講務置講誦簿每日須於本名下書寫所講所誦所習以憑稽考一凡生員遇有事故者須置文簿

但遇生員請假須至祭酒處呈稟批限不許於本堂擅請離堂一凡生員升率性堂方許積分積分之法孟月試本經義一道仲月試論一道詔誥章表内科一道季月試經史策一道判語二條每試文理俱優與一分理優文劣者半分文理純繆者無分歲內積至八分者為及格與出身不及分者仍坐堂肄業試法一如科舉之制果有材學超越異常者取自上裁二十年定一各堂教官所以表儀諸生必當躬脩禮節正其衣冠率先勤

謹使其有所觀瞻庶幾模範後學今後故粧闌茸怠惰
有失威儀者許監丞糾舉以憑區處若監丞故不舉覺
及懷私糾舉不當者從監官奏聞區處一諸生衣巾務
要遵依朝廷制度不許穿戴常人巾服與衆混淆違者
痛決一三日一次背書每次須讀大誥一百字本經一
百字四書一百字不但熟記文詞務要曉通義理若背
誦講解全不通者痛決十下一每月務要作課六道本
經義二道四書義二道詔誥章表策論判語內科二道

不許不及道數仍要逐月作完送改以憑類進違者痛
決一每日寫做一幅每幅務要十六行行十六字不拘
家格或義獻智永歐虞顏柳點畫撇捺必須端楷有體
合於書法本日寫完就於本班先生處呈改以圈改字
少為最逐月通考違者痛決一朔望行釋菜禮各班生
員務要一名名赴廟隨班行禮敢有怠惰失儀及點闌
不到者痛決一生員凡過師長出入必當端拱立俟其
過有問即答毋得倨然輕慢有乖禮體違者痛決一生

員講解如有疑難即當再三從容請問毋得輕慢師長
置之不問蓄疑於心違者痛決一各班生員凡有一應
事務先於本堂教官處稟知令堂長率領赴堂稟覆毋
得徑行煩紊違者痛決一每班給與出恭入敬牌一面
責令各班直日生員掌管凡遇出入務要有牌若無牌
擅離本班及敢有藏匿牌面者痛決一生員果有病患
無家小者許於養病房安養不許號房內四散宿歇有
家小者止就本家若無病而稱病出外遊蕩者驗聞得

實痛決即令到班一生員於各衙門辦事者每晚必須
回監不許於外宿歇因而生事若晝酉不到及點閘不
在者痛決一凡會食務要禮義整肅敬恭飲食不許誼
譁起坐仍不許私自逼令膳夫打飯出外冒費廩膳違
者痛決一凡早晚升堂務要各人親自放牌點閘及要
衣冠嚴肅步趨中節不許攙越班次誼譁失禮違者及
點閘不到者痛決一凡坐堂生員務要禮貌端嚴恭勤
誦讀隆師親友講明道義互相觀勉為善不許燕安怠

情脫巾解衣誼譁嬉笑往來別班談論是非違者痛決
一凡赴堂背書務要各照班次序立以憑抽籤背誦若
前後攙越誼閑雜亂者痛決一生員每夜務要在號宿
歇不許酣歌夜飲因而乘醉高聲誼閑違者及點閘不
在者各加決責一朔望假日毋得在外醉飲倒街卧巷
及因而生事互相鬪毆有傷風化違者痛決一內外號
房務要常川潔淨如是點閘各生號房前但有作穢者
痛決一內外號房各生毋得將引家人在內宿歇因而生

事引惹是非違者痛決一
生員撥住號房俱已編定
號數不許私下那借他人
住坐違者痛決一凡選人
除授及差使辦事等項敢
有畏避躲閃不行赴堂聽
選者奏聞區處一凡生員
於各衙門辦事完結務要
隨即回監肄業不許在外
因而生事違者痛決一凡
生員省親搬取已有定例
敢有不行遵守輒自奏啓
者治罪一丁憂成婚人倫
大節假託詐冒非惟明有
定律其人不堪教養可知
今後生員如有丁憂成婚
等事許於本監告知

具呈禮部除丁憂已有定制外其成婚者定立限期給引回還隨即移文照勘如有詐冒就便依律施行一生員所有一切事務合先於本監告知本監具呈禮部定奪奏聞區處所告是實本監不准方許赴禮部陳告毋得隔越一生員但有違犯前項學規決畢即送繩愆廳紀過若累犯不悛者奏聞區處

事例

宣德十年奏准監生課業做書按季送翰林院考較年

終奏繳文冊數目景泰二年令法司凡監生詞訟不預
已及因事連逮輕者送本監自治弘治十二年申明監
生生員撒潑嗜酒挾制師長不守監規者問發充吏挾
妓賭博出入官府起滅詞訟說事過錢包攬物料等項
者問發為民

生員入監事例

洪武初令品官子弟及民間俊秀能通文義者充國子
學生十年令武臣子弟入國子學讀書十五年令各按

察司選府州縣學生員年二十以上厚重端秀者送京
考留十六年令考中歲貢生員送監再考等第分堂肄
業十八年令會試下第舉人送監卒業二十六年令併
中都國子監生入監永樂元年令選順天府學并大興
宛平二縣學通經能文生員及考順天等八府原報科
舉生員俱充北京國子監生十九年令監生係南人者
送南監宣德八年令生員年四十五以上者考選送監
正統二年令副榜舉人不願就教職者入監卒業三年

令歲貢生南人願入北監者聽十年令生員年四十以上者考選送監十四年令南直隸歲貢生俱送北監景泰七年令雲南歲貢生改送北監天順元年詔在京三品以上官子孫願入監讀書者聽務須科目出身四年令三品以上官子孫不許自願入監五年令生員年四十以上者考選送監成化三年奏准在京三品以上官子孫許一人送監讀書照監例出身有志科目者聽十二年奏准南直隸歲貢生仍送南監十四年令南方舉

人願入南監者聽十八年令在京三品以上官政蹟顯著者蔭一子入監必先試能通經書大義方許弘治十年奏准在京三品以上官經一考給誥命者許一子自陳免考送監讀書如未一考并有過劾退及年遠者俱不許又雜流出身者亦不許其蔭子未仕而故准令補蔭無子者許蔭繼嗣之子若應得蔭子恩典而故未久與奉使外國而死者皆准照例春官侍從官講讀年久輔導有功者沒後子孫乞恩禮部奏請上裁洪武永樂

宣德間日本琉球囉囉諸國官生入監讀書成化間琉球國官生入監

廩饌事例

洪武初定官吏師生會饌三月至十月終日食三飧每人日支米一升十一月至次年二月終日食二飧每人日支米八合五勺若監生有家小者三月至十月終減支每人日支米六合九勺十一月至二月終不減支其監生家小月支食米六斗若雲南貴州所屬并四川土

官生許帶家人一名同食廩米其會饌物料每人日支
青菜三兩醃菜則一兩五錢豆腐黃豆一合磨造鹽三
錢醬二錢花椒五分香油三分醋每四十人共一餅麪
三日一餐每人八兩造饅頭猪肉四兩作餡酵醱三錢
豆粉一兩乾粉索為湯乾魚三日一次每人二兩柴每
人日支二斤十八年勅師生廩膳該司年終通考原收
歲支數目僚屬不得干預永樂二年奏准北京國子監
廩饌等項俱照在京國子監例宣德三年停止會饌其

饅頭餛飩肉逐月照依時估於順天府都稅司門攤課鈔
內折支乾魚椒鹽等料仍辦本色七年令監生有家小
者照南監例月給食米六斗正統七年奏准會饌魚鹽
等料俱照時估折支鈔貫其饅頭粉湯豆腐照饌米例
支給麥豆

膳夫事例

廟戶等役附

洪武十三年令兵部歲撥皂隸內三十五名充膳夫廚
子二十七年定膳夫一百二十名以法司犯笞杖者應

充內一百名給飲饌洒掃等用二十名栽種菜蔬等用
永樂二年奏准北京國子監膳夫以北京刑部囚人撥
充每監生二十五名用膳夫一名廟戶菜戶門子就於
膳夫內撥用厨子二名於順天府撥用按季更替後膳
夫係順天保定永平河間四府民僉充一百名法司囚
徒發充一百五十名其廟戶十名庫子一名亦以四府
民僉充斗級不拘額數亦以囚徒發充又刷印匠四名
係大興宛平二縣均撥宣德三年奏准南監膳夫額設

三百名如有事故法司撥補正統三年令膳夫以糧僉充者准諸司皂隸例一年一換以事發充者不得用竊盜刺字之徒弘治十五年奏准博士等官每員給膳夫一名跟用其餘膳夫雇役銀兩本監明立文簿委官收庫以備公用年終叩算支銷存留數目呈堂立案

給賜事例

洪武二年給監生冬夏衣十三年奏准監生讀書燈油按月申部關用十四年給監生鈔每人二錠製秋衣又

令撥菜地量畝供菜給監生用十五年令監生病故者
有司給棺具歸其喪十六年給監生讀書燈油每月人
一斤十八年令監生患病官給醫藥久病不痊者遣行
人送還其家俟愈入監經過所司供藥物死亡者給棺
歛之仍歸其喪二十一年令工部於監前別造房百餘
間具竈釜床榻以處監生疾病者撥膳夫二十名給役
二十二年給監生北平山西陝西山東廣東廣西四川
福建人在監年深者各鈔五錠年淺者各二錠製冬衣

又給雲南選貢生員鈔錠衣被靴襪撥房居住二十三年給監生直隸人各鈔四錠製冬衣各布政司者給以衣被又給雲南貴州四川土官生鈔錠衣被靴襪又令本監闢射圃給監生弓矢永樂二年申明監生燈油紙劄於順天府官錢給辦燈油無家小作課者每人日支五錢自五月下半月至八月上半月炎暑不支課倣紙月大每人三十一張小盡三十張十八年給貴州選貢生員鈔照雲南例正統十年令監生之家優免二丁差

役又令順天府撥醫士二名監生患病於本府醫學給藥療治弘治十四年奏准監生病故本監移文順天府給銀三兩以為殯殮之具兵部應付口糧脚力遞送還鄉

凡雲南貴州并四川土官生每年於禮部關領冬夏衣各一套

凡日本琉球囉囉諸國官生俱賜冬夏衣鈔被靴襪及從人衣服

給假事例

洪武十六年令監生入監三年有父母者照地遠近定限歸省其欲搬取家小及成婚者亦如之俱不許過限父母喪照例丁憂如同告伯叔兄長喪而無子者亦許立限奔喪十八年令監生有父母年老無次丁者許回原籍侍養其妻故子幼者許送還鄉給與脚力立限回監二十二年奏准畢姻搬取照省親例亦須入監三年者方許三十年定省親等項限期其在路往回月日直

隸限四箇月河南山東江西浙江湖廣六箇月北平兩
廣福建四川山西陝西八箇月其住家月日省親三箇
月畢姻兩箇月送幼子還鄉一箇月丁憂照官員例不
計閏二十七箇月凡過限兩箇月之上者送問復監不
及一月者患病文憑者送監其四川兩廣福建過一年
之上北平山西陝西湖廣半年之上浙江山東河南江西
五箇月之上直隸三箇月之上俱發充吏禮部引奏發
落永樂元年令監生患病許回原籍調治痊日復監四

年令北京監生省親等項照在京國子監例從行部定
限回監違限引奏發落宣德元年令監生給假還鄉久
不復監者量地遠近定限以文書到日為始雲南貴州
交趾十箇月浙江江西山東河南五箇月兩直隸四箇
月如再不到皆發充吏三年令監生省親等項違限者
免治仍行文催促成化四年令監生患病還鄉一年之
外不復監者放為民又令監生告畢姻者須本處官司
預先申部方許弘治十三年奏准監生原籍地方災傷

查報是實照例定限送順天府給引照回原籍省灾依
限復監又令監生除三年省親照依舊例外其畢姻搬
取者務要坐監半年之上本監查勘是實取具本堂教
官及本班監生結狀呈部照例定限放回如有虛詐扶
同一體坐罪

依親事例

洪武二十六年令監生願回原籍讀書者聽正統十四
年令監生年淺者放回原學依親肄業聽取復班天順

三年令依親監生丁憂者有司隨申禮部以憑稽考若預無申文止於起復日扶捏文書到部經該官吏并監生一體究治成化五年令依親監生例該原學肄業者提學官嚴加約束違者罪之六年令放回監生凡遇迎接詔勅拜賀聖節等儀務服本等衣巾隨班行禮不許戴大帽繫纓帶及輒入公門囑託或往他處邀求又令復班監生起送文憑務於本布政司若路不經布政司并南北直隸俱各於本府不許止給於州縣其有隨父

兄任所讀書者俱憑本處官司保結不係任所不准十
四年令坐監舉人撥歷未及願回依親者聽提學并分
巡官及各該有司正官照例提督考校弘治六年奏准
南監自明年為始歲貢并舉人入監者暫留坐監候監
生數多之日照例放回十二年奏准自明年為始歲貢
并舉人官生入監者俱留坐監暫止依親若丁憂成婚
省親送幼子等項仍照舊例其已經依親行取未到者
各處提學官督同所屬正官查審嚴限復監如行取三

年之上無故在家延住有衰老殘疾等項不堪作養及
不願復監者取具親供并原引繳送禮部轉送吏部照
例授以有司職名冠帶閒住若已給上司明文起送而
私回延住過違批限一年之上到部者俱行送問十五
年令監生有願告依親者仍照舊例放回

凡納粟等項監生俱照例放回依親讀書其未冠者提
學并教官嚴加考較以入監日為始扣滿十年方許起
送赴部復監

撥歷事例

洪武間令監生分撥在京各衙門歷練事務三箇月考覈引奏勤謹者送吏部附選仍令歷事遇有缺官挨次取用平常者再歷才力不及者送監讀書奸懶者發充吏宣德三年令在京各衙門辦事監生以半年更代正統三年奏准監生撥歷計其坐監月日淺深給假違限者並同虛曠五年奏准三法司寫本分巡一年出身者於應該歷事內取用兵部戶部清軍寫誥天財庫辦事

三年出身者於入監五年內取用印綬監清黃績黃三年仍歷事二年共五年出身者於入監三年內取用七年令監生丁憂省祭等項俱不作坐監月日八年令丁憂省祭等項不過限者俱作坐監月日其託故過限者雖有文憑不准景泰二年奏准監生清匠滿日照清軍監生例出身三年令依親監生行取文書出部為始以各布政司遠近為限再准水程雲南貴州四川兩廣五箇月福建七十日陝西江西湖廣兩箇月南直隸浙江

四十日山東山西河南一箇月北直隸十五日俱作實
坐堂月日四年令本監刊置格眼紅單每季給與各生
親填年甲籍貫并入監復班月日及開報實坐水程多
寡准作實數不算曠日挨次撥歷又令監生坐堂五年
者辦事歷事二年出身坐堂四年者辦事歷事三年出
身坐堂三年者辦事歷事四年出身坐堂一年二年者
止令辦事不許歷事出身又令監生正歷一年三箇月
寫本一年長差三年天順二年令監生清黃以三年為

限送吏部選用又令本監六堂各置通知簿一扇附寫
監生年甲籍貫并到監日期後遇丁憂省祭等項亦各
附寫如有患病等項事故開寫虛曠若干外實坐堂若
干憑此查考撥歷三年令丁憂復班監生坐堂或辦事
半年方許撥歷六年令歷事監生三箇月考勤後仍歷
九箇月通前一年寫本者亦以一年為滿八年令正歷
六箇月寫本八箇月長差一年半成化五年奏准監生
歷事照天順六年例其清軍寫誥及天財庫書辦等項

仍照例與歷事監生相等分撥六年奏准監生仍以實
坐堂與依親准作坐監月日其復班監生不候行取預
給本處批文托稱買書從學等項來京窺伺攬先投告
入監者查扣水程遠近月日悉作虛曠七年令監生重
歷九箇月減兩箇月十一年奏准監生歷事十箇月減
作六箇月寫本一年減作八箇月其例該一年半者通
減作一年以後仍照舊例弘治八年奏准歷事監生三
箇月考勤後仍歷一年其餘寫本一年清黃寫誥清軍

清匠三年及出巡等項俱照舊例十年令監生依親水程俱不算實坐止循食糧月日淺深撥歷其舉人會試水程仍舊十二年令監生內府雜差准歷事一年滿日上選十四年奏准監生六科辦事照歷事例一年滿日上選十五年令監生正歷一年三箇月者減三箇月長差三年者減一年

凡納粟等項監生照例坐堂十年挨次撥歷若中鄉試者通計先年坐監月日撥歷其未冠願坐監者亦滿十

年方作復監之數

凡歷事監生名數吏部四十一名戶部五十三名禮部一十三名兵部二十五名刑部七十名工部二十四名都察院六十三名大理寺二十八名通政司五名行人司四名五軍都督府五十名謂之正歷三箇月上選滿日增減不定又有各衙門寫本戶部十名禮部十八名兵部二十名刑部十四名工部八名都察院十四名大理寺四名通政司四名隨御史出巡四十二名謂之雜

歷一年滿日上選又有各項辦事清黃一百名寫誥四十名續黃五十名清軍四十名天財庫十名初皆三年謂之長差近俱准減一年上選承運庫十五名司禮監六十名尚寶司六名六科四十名初作短差近亦准寫本例一年滿日上選又有隨御史刷卷一百七十八名工部清匠六十名俱以事完日上選此外又有禮部寫民情條例等項七十二名光祿寺刷卷四名修齋八名叅表二十名報訃二十名費捧十二名錦衣衛四名兵

部查馬冊三十名工部大木廠二十名後府磨算十名
御馬監四名天財庫四名正陽門四名崇文宣武朝陽
東直四門各三名阜成西直安定德勝四門各二名俱
為短差半年滿日回監

考選事例

宣德二年奏准兩京國子監生及各衙門歷事者六部
都察院通政司大理寺翰林院堂上官六科給事中公
同監官揀選凡年五十五以上及殘疾鄙陋不堪教養

任用者皆罷為民仍令錦衣衛指揮一員巡視正統七年免揀選成化二年令兩京監生禮部都察院堂上官公同祭酒一年一次考選其老疾鄙陋不堪作養者給與冠帶原籍閒住五年仍免揀選


公侯駙馬伯讀書習禮事例

洪武五年令將官子弟承襲年幼者入監讀書成化十年令侯伯并駙馬初襲授者送監讀書習禮祭酒一依學規教之其不能背書及懶惰不律者奏聞十一年令

公侯伯初襲并駙馬年二十五以下者俱送監弘治七年奏准公侯伯駙馬下子孫聽從專官教誨立定起止工程置立文簿每間月引起赴本監考較

南京國子監事例

見國子監



明會典卷一百七十三

欽定四庫全書

史部

明會典卷一百八十四至
八十

詳校官編修臣裴謙

編修臣程嘉謨覆勘

總校官知縣臣繆琪

校對官中書臣方大川

謄錄監生臣朱紱

欽定四庫全書

明會典卷一百七十四

翰林院

國初置翰林院正三品衙門設學士承旨學士侍講學士侍讀學士直學士典簿待制修撰應奉編修典籍檢閱等官職專制誥史冊文翰等事洪武十四年改正五品衙門革承旨直學士待制應奉檢閱典簿設孔目五經博士侍書待詔檢討十八年定設學士侍讀學士侍

講學士為正官孔目為首領官侍讀侍講五經博士典籍侍書待詔為屬官修撰編修檢討為史官又有秘書監弘文館及起居注等官後皆不設又設華蓋殿大學士武英殿大學士文華殿大學士文淵閣大學士東閣大學士俱正五品班在本院學士上永樂初簡命編修等官於文淵閣參預機務謂之內閣漸陞至學士等官洪熙元年以輔導任重加陞至師保及各部尚書侍郎職銜仍兼學士大學士又添設謹身殿大學以後或由

他官入閣辦事者皆兼學士大學士或止以待讀等官
入預閣事文淵閣別有印凡機密文字鈐封進至御前
開拆若官吏職役俸糧等項行移各衙門者則用翰林
院印學士一員掌之而凡講讀纂述考校等事各官皆
預焉

事例

凡經筵欽命內閣學士知經筵事或同知經筵事班俱
在尚書都御史上講書展書等官及日講官從內閣於

本院及詹事府春坊司經局官內具名奏請其經筵講章先送內閣看定封進口講直解看定講畢補進

凡東宮出閣講學內閣官提督講讀其講讀侍班及校書正字官從內閣於本院及詹事府春坊司經局官內具名奏請直解先送看定講畢補進其正字例以制勅房官兼職

凡親王出閣讀書內閣官提督檢討等官講讀擬定經書起止所習倣字每日送看

凡修實錄史志等書內閣官充總裁本院學士等官充副總裁皆出欽定纂修從內閣於本院及詹事府春坊司經局官內具名奏請謄錄催纂制勅誥勅房官皆預纂修完日進呈其實錄草稿會司禮監官於內府燒燬凡玉牒十年一次內閣奏請學士等官二員纂修

凡皇子名及各王府奏請子名親王公主及郡王郡主縣主郡君縣君鄉君封號俱內閣擬奏請旨點用禮部抄出施行

凡親王及文武大臣賜謚禮部奏准開具揭帖送內閣擬奏請旨點用本部抄出施行

凡朝廷祭告祝文王府謚冊壙誌諭祭文及文武大臣諭祭文俱內閣擬撰其謚冊等文禮部抄出施行

凡內閣所掌文官誥勅正統間以學士專管後久不設弘治七年復設

凡內閣所掌制勅詔旨誥命冊表寶文玉牒講章碑額及題奏揭帖等項一應機密文書各王府勅符底簿制

勅房書辦文官誥勅及番譯勅書并四夷來文揭帖兵部紀功勘合底簿等項誥勅房書辦各用中書舍人等官於本院或各該衙門帶俸遇有陞遷仍舊供職其有堪別用者亦從吏部推舉

凡駕詣郊壇或巡狩行幸親征內閣官扈從制勅房官隨行書辦遇有勅旨即時撰寫

凡內閣收貯御製文字實錄玉牒副本古今書籍及紙劄筆墨等項典籍等官收掌

凡內閣擬撰各王府冊誥及文官誥勅進稿畢編類勘合中書舍人領出書寫原稿繳納奏捷并賀謝等致詞鴻臚寺領出宣念

凡兩京鄉試及會試考試官禮部奏行內閣於大學士學士等官及詹事府春坊司經局官內具名奏請欽命其會試同考試官於本院侍讀等官及春坊司經局官內與各衙門官相兼推選收掌試卷用制勅房官一員凡殿試讀卷官內閣於大學士學士等官內具名從該

部奏請至日與各衙門該讀卷官詳定試卷次日同赴
文華殿內閣官將第一甲三卷以次進讀俟御筆批定
出將二甲三甲姓名填寫黃榜又次日早同赴華蓋殿
內閣官進至御座前以次拆卷將姓名籍貫面奏司禮
監官授制勅房官填榜畢開寫傳臚帖子內閣官一員
捧榜出至奉天殿授禮部尚書制勅房官將帖子授鴻
臚寺官傳臚其受卷彌封掌卷官從內閣於本院及春
坊等官并制勅房官內推選與各衙門官相兼執事

凡頒詔內閣官一員捧詔自奉天殿左門入至華蓋殿候駕興捧出至奉天殿授于禮部尚書

凡聖節冬至正旦大朝賀及頒詔進實錄等大禮本院修撰等官四員於奉天殿寶座東西向與中書舍人對立侍班

凡東宮千秋節及冬至正旦朝賀本院修撰等官二員於文華殿內與春坊司經局官對立侍班

凡考試歲貢生員禮部奏請出題本部官赴內閣領題

試畢送卷本院官批定去取送部奏請施行

凡考試願就教職舉人監生吏部奏請出題本部官赴內閣領題試畢送卷本院官批定中否送部奏請施行
凡各處儒學訓導九年考滿吏部出題考試印封文卷送內閣委本院官批定去取送部奏請施行

凡庶吉士內閣奏請學士等官二員教習本院仍行戶部給燈油錢兵部撥阜隸刑部給紙劄工部撥房屋順天府給筆墨光祿寺給酒飯內閣按月考試俟有成效

送吏部銓注本院并除各衙門職事

凡各處舉到幼童奉旨送院讀書習字者月給食米內
閣稽考課業俟有成效奏請擢用其願科舉出身者聽
凡四方蕃國翻譯文字永樂五年設四譯館內分八館
曰韃靼女直西蕃西天回回百夷高昌緬甸選國子監
生習譯宣德元年兼選官民子弟委官為教師本院學
士稽考課程後內閣委官提督弘治初奏准科目出身
四品以上官二員提督其官生公會按月從本院印給

仍繳送稽考及食糧授職從吏禮二部奏會內閣出題
考試中否仍從該部奏請施行

凡四譯館習譯監生子弟舊例月支米一石會官考試
一年通習者與冠帶全不通者黜退正統元年奏定考
中一等者冠帶為譯字官又一年再考中授職弘治三
年奏准子弟不許別圖出身三年後考中食糧月給米
一石又三年考中冠帶為譯字官又三年考中授序班
職事初試不中者許再試三試不中者黜退為民監生

初入館照坐監例食糧三年考中食糧一石家小糧仍舊又三年考中冠帶又三年考中授從八品職事三試不中者送回本監別用其曾習舉業者非精通譯字不准應試八年奏准子弟有願習舉者考送順天府應試凡東宮及親王冠禮內閣官充賓贊婚禮充納徵等使從禮部奏請欽命

凡朝鮮安南國頒詔及冊封學士等官充正使從禮部奏請點差

凡兵部清理武官貼黃奏請命學士等官一員同該部及法司堂上官於闕右門清理本院官專管撰述

凡該總軍丁告願科舉者兵部奏送本院出題考試批定中否送本部施行

凡內閣官光祿寺日逐支給料物撥厨役製造酒飯司禮監撥匠作裝製書籍紙劄工部撥輪班匠供役本院官酒飯俱於光祿寺支給

凡內閣合用筆墨及雌黃硃墨俱於司禮監關給紙劄

本監及刑部關給本炭惜薪司及工部關給

凡五府六部都察院等衙門關給內府精微文簿開寫
日行事務註銷前件按月奏送本院稽考年終類送司
禮監交收

凡各衙門領勅官員俱赴內閣會有勅書方赴鴻臚寺
報名辭朝領勅

凡國子監生課簿按月送內閣稽考

凡一應官員閒雜人等不許擅入內閣違者治罪

凡本院官吏及帶俸官俸糧舊於禮部帶支後奏准本院自行收支

南京翰林院事例

凡本院官永樂後止設學士一員掌印遇有員缺從內閣推舉

凡南京各衙門遇朝廷冊立大禮及上徽號等項合用慶賀表箋南京禮部行本院撰進

凡本院官吏俸糧與翰林院同

凡本院合用匠役於南京工部撥給

明會典卷一百七十四

欽定四庫全書

明會典卷一百七十五

尚寶司

國初設符璽郎正七品後置尚寶司正三品衙門設卿少卿丞職專寶璽符牌等事洪武元年改正五品衙門御寶奉天之寶皇帝之寶皇帝行寶皇帝信寶天子之寶天子行寶天子信寶制誥之寶勅命之寶廣運之寶御前之寶皇帝尊親之寶皇帝親親之寶敬天勤民之

寶

事例

凡誥勅等項寫完合用某寶本司官會尚寶監官於奉
天門用後俱同

凡諸王將軍并文武官員誥勅寫完本司官於御前奏
請寶用

凡各衙門勘合用盡預編完某字號勘合并底簿用寶
訖勘合本司收貯底簿付尚寶監官繳進

凡吏部選過文職貼黃三年一次底簿每年一次本司奏請用寶

凡兵部每年選過武職貼黃又每三年清理武職大小貼黃簿本司奏請用寶

凡用御寶俱預編某字號勘合一百道底簿一扇用盡再編其勘合本司收貯底簿付尚寶監繳進

凡遇慶賀大禮先期一日本司官於御前奏請寶捧是日設寶案於華蓋殿至期官二員各捧寶於御前分行

至奉天殿東西相向立上陞座西立者過東各置寶於案禮畢仍捧寶分行至華蓋殿置案上而出

凡每歲駕詣郊壇行大祀禮本司官例於承天門外乘馬從寶後行禮畢仍從寶而回

凡寶色合用銀硃奏行工部轉行順天府支給官錢買辦其油蜜熟艾白芨皂莢等物俱於各該衙門關用

凡每年終本司奏行欽天監擇日洗寶至期尚寶監官關香物入水捧寶於奉天門洗淨入匣

凡每年終本司具本年用過寶總數於御前奏進

凡大祀天地社稷享太廟并看牲視學耕藉田公侯伯
勲衛錦衣衛并金吾等二十衛官扈駕巡綽各赴本司
領金牌懸帶

凡每日五府都督一員及帶刀千百戶一員夜巡內皇
城點間鋪軍各赴本司領金牌并申字十七號令牌一
面

凡每三日金吾等二十衛各輪官四員計每班四十員

領金牌隨朝巡綽畢仍赴司點閱

凡侯伯駙馬一員專管府軍前衛帶刀官二十員每日上直又侯伯一員專管園子手將軍每夜上宿又中軍都督府都督一員專管大旗下五軍官員將軍六百二十五人又都督一員專管勇士又都指揮一員專管傳令义刀手又侯伯駙馬一員專管大漢將軍又錦衣衛當駕官指揮一員千戶二員百戶十員三日輪班上直各赴本司關領金牌其金牌之制面上鑄仁義禮智信

五字號下鑄守衛二篆字背鑄凡守衛官軍懸帶此牌
等二十四字

仁字一號至四十號上俱龍形公侯駙馬伯領

義字一號至五十號俱虎形指揮勲衛領

禮字一號至一百五十三號俱麒麟形千戶領

智字一號至三百三十號俱獅子形百戶領

信字一號至一千六十九號俱祥雲形將軍領

凡金吾等二十衛守衛官夜巡各赴本司關領令牌午

門指揮二員千戶一員領申字一號至四號四面長安
左右門各指揮二員千戶一員東華門指揮一員千戶一
員領申字五號至八號四面西華門指揮一員千戶一員
領申字九號至十二號四面玄武門指揮一員千戶一
員領申字十三號至十六號四面

凡留守五衛巡城官并金吾等二十衛守衛官各赴本
司關領銅符留守五衛指揮領承字東字西字北字號
四面其字號俱左半字金吾等二十衛端門承天門指

揮二員千戶一員領承字號一面東安門指揮一員千戶一員領東字號一面西安門指揮一員千戶一員領西字號一面北安門指揮一員千戶一員領北字號一面其字號俱右半字已上俱與留守衛比對銅符字號相同方許點閘

凡皇城九門守衛軍與圍子手各領勇字號銅牌計二萬五十五面

凡五城兵馬指揮司夜巡每日一城輪官一員赴本司

關領令牌東城兵馬指揮司領木字一號二號二面西城兵馬指揮司領金字一號二號二面中城兵馬指揮司領土字一號二號二面南城兵馬指揮司領火字一號二號二面北城兵馬指揮司領水字一號二號二面凡大祀天地享太廟祭社稷山川等神陪祀供事官及執事人等入壇俱赴本司關領牙牌圓花牌陪字一號至三百五十號陪祀官領長花牌供字一號至三百八十號供事官領長素牌執字一號至一千四百七十號

執事人領

凡錦衣衛校尉上直俱赴本司領嚴字號雙魚銅牌

凡光祿寺吏典厨役遇大祀該班者俱赴本司領善字號雙魚銅牌

凡東駕侍衛官員將軍該侍衛日俱赴本司領牌

凡文武朝叅官并錦衣衛當駕官尚膳監辦膳官騰驤武驤四衛養馬官所領牙牌每年終各衙門造冊送本司查理文武官牙牌字號公侯伯勲字號駙馬都尉親

字號文官文字號武官武字號樂官樂字號

凡親王之國及鎮守巡撫等官奏請符驗俱從本司關
領如在外鎮守等官事故去者則付所在官司收貯候
更代者就彼付領每年終各處具由奏報查考符驗之
制上織船馬之狀起馬者用馬字號起船者水字號起
雙馬者達字號起單馬者通字號起站船者信字號
凡監察御史出差巡按清軍巡鹽巡茶巡倉巡河巡捕
盤糧勘事等項俱赴本司領印如本道印領盡奏過方

許借領別道印其南京御史從都察院差者許在京對道御史代領俱事畢繳還

凡官員人等領符牌等項俱用本衙門印信手本及赴司畫字方許領出其宿直侍衛等項有違悞者本司叅奏

凡金牌青絲條歲例該造一千條與歲造黃絨寶條及紅錦俱行工部辦用

凡寶鈔提舉司奏造鈔牌本司官同戶部官并給事中

及各監官鑄造其令牌牙牌有損壞不堪懸帶者行印
綬監改造

凡本司官員并監生每日酒飯俱於光祿寺支給
凡本司官員俸糧俱於通政司帶支

南京尚寶司事例

凡符牌等項南京官軍人等隨駕至行在給與懸帶南
京兵部因移文南京工部改造木牌其制俱與銅牌同
轉送本司給與守衛夜巡并點閘官軍其後凡有失落

損壞成造如前今長木牌計一百一面飛字一號起五
面效字三號一面橫字五號一面辰字一號起五面棠
字三號一面沛字四號一面慎字五號一面曰字三號
四號二面恥字四號一面爵字一號一面減字一號起
四面圖字一號一面潔字四號一面玖字三號五號二
面手字一號一面楚字二號二面拜字二號四面仕字
三號一面彫字一號起五面荒字五號一面近字一號
一面茲字一號一面賤字一號一面求字二號一面得

字三號一面暑字四號一面禪字四號五號二面藁字
四號一面甲字一號起五面多字二號五號二面落字
三號四號二面孟字三號四號二面道字一號起五面率
字二號起四面庭字一號起四面匪字一號起四面篤
字一號起四面宿字一號起四面碣字一號一面辭字
一號起三面清字四號一面鬱字四號一面殿字四號
一面能字二號一面兄字二號一面毀字二號一面邇
字三號五號二面罪字三號一面居字五號一面遣字

一號一面計小木牌二千九百二十一面旗手字一號
起二百六十九面府軍字一號起二百七十面府左字
一號起二百五十五面府右字一號起三百六十四面
府後字一號起二百三十五面金左字一號起七十七
面金右字一號起一百四面金前字一號起二百八十
六面金後字一號起二百三十五面羽左字一號起二
百四十五面羽右字一號起二百六十面羽前字一號
起五十面虎左字一號起二百六十六面

明會典卷一百七十五

欽定四庫全書

明會典卷一百七十六

欽天監

國初置太史監設太史令通判太史監事僉判太史監事校事郎并五官正等官後改監為院設院使同知院判五官正典簿雨暘司時序郎紀候郎等官洪武元年又改太史院為司天監設監令少監監丞主簿主事五官正副及監候司晨漏刻博士又置回回司天監設監

令少監監丞三年始改欽天監為正五品衙門職專歷
數天文地理之事四年改監令為正儀大夫少監分朔
大夫五官正司立大夫監丞靈臺郎五官保章正平秩
郎五官靈臺郎司正郎五官挈壺正挈壺郎等散官十
四年定其品級員數其散官從文職給授二十二年改
監令為監正監丞為監副三十一年回回監革回回歷
法亦隸本監

事例

凡本監習業者分為四科自五官正以下與天文生陰陽人各專一科回回官生附隸本監子弟仍世其業以本國土板厯相兼推算

凡天文如日月星辰風雲靈霧本監各委官生晝夜占候或有變異舊例自具白本占奏正統後始會堂上官僉書同奏其觀象臺分定四面每面天文生四人專視凡本監觀星有盤係洪武十七年造又渾天璿璣玉衡簡儀俱正統四年造十一年奏准簡儀修刻黃道等度

圭表壺漏俱如南京舊制又造晷影堂以便窺測調品
景泰六年又造簡儀銅壺

凡定時刻有漏換時有牌報更有鼓警晨昏有鐘鼓其
器皆設於譙樓初皆屬順天府正統六年改屬本監輪
差漏刻博士提調陰陽人如法調壺換牌其陰陽人仍
從順天府各縣僉充鐘鼓改屬旗手衛撥軍擊撞

凡推算日月交食本監先期備開分秒時刻并起復方
位具奏禮部通行內外諸司臨時救護食畢本監仍按

占書具奏如食不及一分與回回歷雖食一分以上俱不行救護至救護時本監官專報時候不隨班行禮

凡歲造大統歷先期二月初一日進呈來歲歷樣然後刊造一十五本送禮部差人賫至南京并各布政司照樣刊印

凡每歲進御覽月令歷大統歷七政躔度歷洪武間以九月初一日進後以十一月初一日進當日以大統歷給賜百官頒行天下東宮歷同日於文華殿進其儀注

俱見禮部祠祭司太皇太后皇太后中宮歷俱司禮監官捧進本監仍具本奏知

凡頒歷後各王府差人於內府司禮監關領其內府各衙門亦於司禮監給散如琉球占城等外國正統以前俱因朝貢每國給與王歷一本民歷十本今常給者惟朝鮮國王歷一本民歷一百本

凡造歷以洪武甲子為歷元仍依舊法推算不用捷法洪武二十九年欽定歷註永為遵守

上歷註三十事東宮親王歷同

祭祀

祈福

施恩封拜

覃恩受封

行賞封爵

賞勞封冊

封官
肆赦

慶賜

上冊進表章

頒詔

冠帶

註時坐
向方位

行幸

註時

宴會

招賢

出師

註時出某方位選
將訓兵安撫邊境

遣使

結婚姻

嫁娶

註時

進人口

註時納
奴婢

沐浴

整容

剃頭

整手足甲

療病

求醫
針刺

入學

註時

安牀

註時

裁製

註時

興工動土豎柱上梁

註時

繕城郭

開渠穿井

掃舍宇

般移

註時

栽種

牧養

捕捉

畋獵

民厯註三十二事

祭祀

求嗣除求福

上表章

上官

註時任

臨政赴

親民

結婚姻

嫁娶

註時

冠帶

註時坐
向方位

會親友

出行

入學

註時

進人口

註時

安牀

註時

裁衣

註時

納財

交易

開市

經絡

沐浴

剃頭

療病

開渠穿井

修造動土豎柱上梁

註時

破土安葬

移徙

註時

掃舍宇

安碓磴

栽種

牧養

伐木

捕捉

畋獵

平治道塗

破屋壞垣

永樂七年欽定士道歷註六十七事

祭祀

祈福

解除

冠帶

註時坐
向方位

宴會

招賢

選將訓兵

安撫邊境

結婚姻

進人口

註時

求醫療病

入學

註時

興工動土

註時

豎柱上梁

註時

補垣

繕城廓

安碓礮

開市

立券

交易

沐浴

安牀

註時

整手足甲

緩刑獄

施恩惠

恤孤惻

布政事

捕捉

施恩封拜

覃恩肆赦

頒詔

雪冤枉

賞賀

遣使

裁製

註時

上官赴任

般移

註時

開渠穿井

修置產室

納畜

牧養

取魚

慶賜

行幸

掃舍宇

整容

剃頭

納采問名

行惠慶

舉正直

出軍代征

經絡

求嗣

上冊進表章

修飾垣墻

納財

栽種

臨政親民

平治道塗

出師

註時出某方

詔命公卿

築隄防

宣政事

營建宮室

命將出師

嫁娶

畋獵

凡進用諸厯俱以紅黑字分辨并各有尺寸裁造親王諸厯及民厯亦各依式裁造其黃藍綾絹及黃紙裏造者俱有定式

凡頒厯洪武初有司徵斂工本錢十四年免徵永樂後合用各色綾絹紙割顏料俱先二年十二月內會計有無閏月各用若干奏行山東等布政司真定等七府買

辨

凡選郊祀時享等項日期每歲十一月中本監堂上官擇日率歷科官午後沐浴更衣於本衙門齋宿次日早會選具副本請旨仍具例行內府中路并設案題本得旨次日早掌印官捧正本照例行至奉天門案前跪進俟御覽畢叩頭由東門出復班仍具揭帖差官賫赴禮部太常寺知會

凡營造出師等事奉旨選擇年月日時方位進呈若陵

寢及各王府安葬選擇吉地奏用其差委官生各有次
不許紊亂

凡每歲立春日本監差官二員往順天府候氣回監具
呈依書占奏

凡立春前期候氣官同順天府官赴東直門外導引芒
神春牛至府

凡遇聖節正旦冬至及頒詔大禮先期本監官面奏設
定時鼓於文樓至期定時漏刻博士一員報時五官司

辰一員立御道東雞唱五官司辰一員擊鼓漏刻博士
一員登文樓上候上陞殿鳴鞭畢報時官捧時牌報卯
時雞唱官唱日出卯照萬方光四表畢擊鼓五聲

凡本監人員洪武六年令永遠不許遷動子孫只習學
天文歷算不許習他業其不習學者發海南充軍

凡本監官犯罪成化十三年奏准應為民者仍充天文
生應役應發充軍者奏請處治

凡本監官生有父母喪例免丁憂

凡天文生除本身外再免一丁充當民差陰陽人止免
本身其各門不係應役者不准

凡天文生食糧月支七斗陰陽人四斗俱照醫士醫生
例其譙樓陰陽人止支三斗

凡天文生俱以父祖世業代補有缺舊例天下訪取仍
會禮部考驗收用後或有投充及收用義男女壻者禮
部議准不許止選世業子弟立教師教習有成遇天文
生缺於內選用其教師亦量陞授弘治十一年令訪取

世業原籍子孫并山林隱逸之士及致仕退閒等項官吏并監生生員軍民人等有能精通天文歷數陰陽地理及五星子平遁甲大定并六壬占課灼龜等術者每府不過一二人試中收充供役

凡觀象臺譙樓合用燈油木炭及祭祀齋宮調品壺漏亦有油炭俱行禮部坐派順天府送用

凡天下府州縣舉到陰陽人堪任正術等官者俱從吏部送本監考中送回選用不中者發回原籍為民原保

官吏治罪

凡本監合用紙劄成化間奏准照例遇吏部送考陰陽生中式者令其量出應用

凡天文生有犯弘治十三年奏准徒流照舊例決杖一百餘罪收贖笞杖有力納鈔無力的決其犯竊盜掏摸搶奪等項亦刺字充警并雜犯死罪俱做工不在收贖之限

凡本監俸糧初於禮部支給後從戶部撥本監自行收

放

南京欽天監

事例

凡本監造歷每年六月內從禮部發到歷樣印完給散
南京各衙門并直隸各府州縣

凡本監造歷紙分派應天寧國二府并浙江解納俱限
六月以裏至京

凡占候天象本監自洪武以來設觀星臺於鷄鳴山上

令天文生分班晝夜觀望或有變異開具揭帖呈堂上官當奏聞者隨即具奏

凡天文生俱以世業子弟習學者選食糧分撥各科凡天文生月糧照欽天監例

太醫院

國初置醫學提舉司後改太醫監又改太醫院設院使同知及典簿等官職專診視疾病修合藥餌等事洪武十四年定為正五品衙門更設太醫院令丞吏目及御

醫始依文職授散官二十二年復改院令為院使丞為院判其屬置惠民藥局又於本衙門置生藥庫各設大使副使

事例

凡本院習業分十三科自御醫以下與醫士醫生各專一科

凡本院院使院判御醫日於內府御藥房兩班輪值供事

凡收受四方進貢及儲蓄上用藥品俱於內府收掌供
用藥餌國初令醫官就內局修製本院官診視御脈御
醫叅看校同會內臣就內局合藥將藥貼連名封記具
本開寫本方藥性治證之法於日用之下醫官內臣書
名以進置簿厯用中書省印合縫進藥奏本既具隨即
附簿年月下書名內臣收掌以憑稽考烹調御藥本院
官與內臣監視每二服合為一服候熟分為二器其一
器御醫先嘗次院判次內臣其一器進御

凡各王府差人請醫視疾本院奉旨差官或醫士往視
若文武大臣及外夷酋長有疾亦奉旨往視其治療可
否皆具本覆奏或軍中缺醫亦憑總兵巡撫官奏請撥
用

凡醫家子弟舊例選入本院教習醫術弘治五年奏復
行之推堪任教師者二三人教習每季考試三年或五
年堂上官一員同醫官二員考試通曉本科者收充醫
士食糧當差未通曉者聽令學習一年再試三試不中

者黜之若五年考試成材者多其教師奏請量加陞授
凡醫士醫生洪武間各有額數其後增減不一俱於本
院修合藥餌若醫官醫士仍差委各處用藥

東直房

醫士三
十六名

安樂堂

醫官三員
醫士三十三名

司禮監

醫士
二名

書堂

醫士
六名

乾明門

醫士
三名

浣衣局

醫士
二名

天壽山

醫士
二名

松林靈臺

醫士
三名

團營

醫官一員
醫士十二名

五軍營

醫士
三名

三千營

醫士四名

神機營

醫官一員
醫士四名

錦衣衛

醫士三名

府軍前衛

醫士三名

惠民局

醫士三名

會同館

醫士三名

大慈恩寺

醫士三名

宣府

醫士一名

紫荊關

醫士二名

居庸關

醫士一名

龍門千戶所

醫士一名

萬全右衛

醫士一名

懷來衛

醫士一名

山海關

醫士一名

廣寧衛

醫士二名

寺子峪

醫士一名

開原

醫士一名

永寧衛

醫士一名

獨石

醫士一名

倒馬關

醫士一名

白羊口

醫士一名

凡醫士食糧月支七斗醫生月支四斗醫官先年月支

二石弘治間照醫士例止支七斗

凡各王府缺良醫從本院推舉醫士送吏部選用

凡本院取充醫役者洪武以來例免原籍民差弘治二

年令御藥房供事者免二丁本院應役者免一丁

凡醫生殘疾及年七十以上不堪應役者放免

凡天下歲辦藥材俱於出產地方派納永樂以後例共
五萬五千四百七十四斤成化以來其數漸增今共計
一十六萬三千五百五十七斤有零蜈蚣蛇六十四條
蛤蚧天雄二十一對虫蛀木瓜二十箇

浙江布政司三萬一千八百五十一斤七兩金箔一百
八貼銀箔七十二貼

江西布政司七千五百五十六斤一十二兩

湖廣布政司四千八百四十九斤七兩七錢二分六釐
白花蛇九條烏蛇十條

福建布政司二千七百六十五斤一兩九錢一分

四川布政司一萬六千四百二十斤八兩天雄四對

廣東布政司九千九百二十九斤三兩四錢蛤蚧一十
七對

廣西布政司九千七百二十三斤一十兩

山西布政司八千九百五十五斤四錢五分

山東布政司八千七百三十八斤六兩

河南布政司八千六百四十九斤四兩

陝西布政司一萬一千七百四十四斤七兩

遼東都司八百斤

應天府三千六百五十八斤八兩

鎮江府三千七百一十七斤六兩六錢赤頭蜈蚣四十

五條

蘇州府一萬八百七十九斤三兩

松江府一千四百四十斤

徽州府九百四十九斤八兩

寧國府四千九百九十四斤一十兩二錢烏爛蟲蛀下

木瓜二十箇

太平府二百八十一斤七兩六錢

池州府六百一十三斤

鳳陽府二千七斤

揚州府七百四十五斤三兩二錢

淮安府三千一百二十七斤八兩

廬州府八十五斤一十二兩五錢九分

安慶府四百五十八斤七兩

廣德州六百三十斤

滁州一千五百九十二斤一十一兩二錢五分

徐州六十三斤六兩二錢三分

和州二百二十三斤一十四兩

永平府二百一十五斤

隆慶州七百斤

保安州七百斤

大名府一千五百斤

河間府二千一百七十七斤

保定府五百斤

真定府七百六十五斤

凡天下解納藥材俱貯本院生藥庫以御醫二員與大使一員辨驗收放禮部仍委官一員監收至年終照例

造冊二本一留本院備照一送禮部查考

凡藥材如丹砂鹿茸等項先因在外鎮守等官額外進貢沿途害人成化二十三年詔禁止勿進

凡軍中馬病本院給與藥餌

凡天下府州縣舉到醫士堪任醫官者俱從禮部送本院考試仍委該司官一員會考中者送吏部選用不中者發回原籍為民原保官吏治罪

凡本院合用紙劄俱令府州縣舉到醫士考中者量納

應用後不行成化十八年奏准仍照舊例

南京太醫院

事例

凡本院藥餌俱南京禮部收到湖廣等布政司解來生藥製造

凡南京各營該用藥餌俱撥醫士隨病供應凡醫士醫生俱以世業子弟習學考選分撥各科

凡醫士醫生月糧照太醫院例

明會典卷一百七十六

欽定四庫全書

明會典卷一百七十七

上林苑監

永樂五年置上林苑監正五品衙門設左右監正左右
監副左右監丞典簿所屬良牧蕃育嘉蔬林衡川衡冰
鑑典察左右前後十署每署設典署署丞錄事職專苑
圍蕃牧種植等事洪熙元年本監止存左監丞典簿餘
皆革又以蕃育署帶管良牧川衡兩署嘉蔬署帶管冰

鑑林衡兩署其四署與各典察署所管人戶俱撥蕃育
嘉蔬署暫管宣德十年止存蕃育嘉蔬良牧林衡四署
餘皆革

蕃育署

原管畜養戶二千三百五十七

分撥畜養草場地一千五百二十頃三十四畝二分二釐

計畜養

鵝八千四百七十隻

雄四千二百一十七隻

雌四千二百五十三隻

鴨二千六百二十四隻

雄八百八十九隻

雌一千七百三十五隻

雞五千五百四十隻

雄七百八十三隻

雌四千七百五十七隻

嘉蔬署

原管栽種戶九百

分撥栽種蔬菜等地一百一十八頃九十九畝八分四釐八毫

良牧署

原管牧養戶二千四百七十六

分撥牧養牲口草場等地二千三百九十九頃一十三

畝六分六釐

計牧養牛羊猪四十五百六十六隻

牛九百二十九隻

牯牛九十七隻

牝牛八百三十二隻

羊二千五百六十九隻

綿羊二千三百九十六隻

公羊一百四十八隻

母羊二千一百四十八隻

山羊一百七十三隻

公羊一十六隻

母羊一百五十七隻

猪一千六十八口

兒猪六十八口

母猪一千口

林衡署

原管栽種戶一千九百八十三

分撥栽種果樹花木等地二百三十八頃一十五畝七分一釐

遷民住基地一十頃九十五畝

自種地五十一頃四十二畝

事例

凡牧養牲口栽種果蔬等項永樂間用北京效順人充役後於山西平陽澤潞三府州起撥民一千戶俱照邊

民例給與盤纏口糧連當房家小同來分派使用仍令自備牛具種子於附近荒閒地土內儘力耕種食用喂養牲口

凡牧養每二丁養羊一隻每五丁養牛一隻餘各驗丁派養其牲口編號造冊挨次進送內府并太常寺光祿寺供應每歲除原種取用不缺外牛孳生犢一隻羊孳生羔二隻餘皆與民自用羊毛惟種羊依時剪取入官孳生羊毛從民收用

凡牧養栽種地東至白河西至西山南至武清北至居庸西南至渾河永樂十四年奉旨一應人不許於內圍獵有犯禁者每人罰馬九匹鞍九副鷹九連狗九隻銀一百兩鈔一萬貫仍治罪雖親王勲戚犯者亦同

凡大興宛平二縣附近果園正統元年令聽本監管屬遠者并外府州縣果木俱令有司自行管屬果品聽其自進

凡原撥并續撥栽種蔬菜果木樹花牧牲草場衙門公

廨及住基等地弘治十四年踏勘過共四千一百三十四頃八十五畝八分八毫見在地三千九百七十頃五十八畝八分三釐會勘出侵占失迷地一百六十四頃二十六畝九分七釐八毫四至築立封堆一千六百七箇

凡日逐進用菜蔬果品宣德十年奏准以荆府遺下舊房一所東安門外舊行用庫房一所頓放弘治五年又奏准以東安門外保大坊官房一所頓放

五城兵馬指揮司

國初置兵馬指揮使司設都指揮副都指揮知事後改
兵馬指揮司為正四品衙門設指揮使副指揮知事各
門設兵馬洪武十年改正六品衙門設指揮副指揮職
專京城巡捕等事知事革二十三年定設五城兵馬指
揮司添設吏目

事例

凡弓兵每司額設八十名一年更替從在外州縣僉解

兵部職方司分撥應役

凡各城坐鋪火夫除有例優免外其餘俱要編當敢有投托內府及在外各衙門差人或給免帖擅入各司分付優免聽該司連人呈送巡城御史治罪其勇士等項正身改調京衛充軍干碍內外官員奏請定奪

凡京城該管地方街道坍塌溝渠擁塞及皇城周圍坍塌工部都水司行委分管填墊疏通

凡地方或有盜賊生發即督領弓兵火甲人等擒捕

凡官民房舍火起不分地方各司督領弓兵火甲人等俱持器具救火

凡巡城御史批發囚犯該司取供送法司擬罪發落

凡刑部都察院照勘提人檢屍追贓分委該司承行

凡各司地方堆垛發賣食鹽戶部行該司官巡察有無文引曾否掣割具有夾帶興販及不由崇文門放入者捕送治罪

凡軍民人等在於街市鬪毆及姦淫賭博撒潑搶奪一

應不務生理之徒俱許擒拏

凡地方軍匠人等舊例令各家俱於門前置粉壁一面開寫本家籍貫人口身後營生并寫不敢窩藏逃軍逃匠囚徒盜賊等項以憑挨究

凡每月捉獲囚數各司官於御前奏知送科

凡夜巡各司每日輪官二員赴尚寶司關領銅牌二面凡光祿寺打掃各司每月輪三日撥火夫三百名

凡駕詣郊壇及親王出府之國成婚開設舉場修設齋

醺發送宮人率領火甲供事

凡選妃禮部儀制司行各司選報該管地方良家女子
送諸王館備選

凡各司官奉旨不許各衙門擅自拘辱及占用弓兵火
甲亦不許內府衙門拘要打卯挨捕逃匠

凡各司官員俸糧俱於兵部帶支

南京五城兵馬指揮司

職掌巡捕及街道溝渠囚犯等事皆與五城兵馬司同

明會典卷一百七十七

欽定四庫全書

明會典卷一百七十八

僧錄司

國初置善世院洪武十五年改僧錄司正六品衙門設左右善世左右闡教左右講經左右覺義職專釋教之事屬禮部衙門置於天界寺永樂遷都後置於大興隆寺南京仍舊

事例

凡本司官皆選精通經典戒行端潔者為之不支俸如有行移以僧人掌行僕從以佃戶充役

凡僧有三等曰禪曰講曰教在外僧人府屬僧綱司州屬僧正司縣屬僧會司管轄皆統於本司

凡度僧以十年一度在京行童從本寺具名在外從僧綱等司造冊給批俱從本司轉申禮部本部官仍同禮科官考試能通經典者給與度牒其僧人額設府不過四十人州三十人縣二十人

凡僧人給授度牒洪武二十五年令本司造周知冊自
在京及在外寺院僧名以次編之其年甲姓名字行及
始為僧年月與所授度牒字號俱載於僧名之下頒示
天下僧寺凡游方行脚至者以冊驗之其不同許獲送
有司解至京治以重罪容留者罪如之其後不造歲久
仍有詐偽者至正統五年復照舊造凡各處額設寺俱
有僧人住持從各寺僧人保舉有戒行通經典者上僧
綱等司僧綱等司申於本司給與劄付其有錢糧大寺

轉申禮部出給劄付

凡本司官每月止朝朔望班列於西如遇慶賀頒詔等事行禮皆預班列於東

凡在京祭祀本司官皆不預在外同

凡僧官僧人服色見禮部儀制司洪武二十五年令瑜珈僧許穿靴

凡內外僧官專一檢束天下僧人恪守戒律清規違者從本司懲治若犯與軍民相干者從有司懲治

南京僧錄司

事例

見僧錄司

道錄司

國初置玄教院洪武十五年改道錄司正六品衙門設左右正一左右演法左右至靈左右玄義職專道教之事屬禮部衙門置於朝天宮兩京俱同

事例

凡本司官選用并不支俸及行移等項俱與僧錄司同

凡道士有二等曰全真曰正一在外道士府屬道紀司州屬道正司縣屬道會司管轄皆統於本司

凡道童限年給度牒各司申送及考試等項俱與僧錄司同

凡本司官每月止朝朔望如遇慶賀頒詔等事行禮皆預班列於東

凡在京祭祀本司官皆不預在外同

凡慶成宴本司官皆預

凡道官道士服色見禮部儀制司洪武二十五年令正一道士許穿靴

凡内外道官專一檢束天下道士違者從本司懲治若犯與軍民相干者從有司懲治

南京道錄司

事例 見道錄司

神樂觀

洪武十二年置神樂觀設提點知觀專管樂舞生屬太

常寺

事例

凡樂舞生洪武初選用道童後樂生用道童舞生以軍民俊秀子弟為之十三年又詔公侯及諸武臣子弟習樂舞之事又令禮部揀選樂舞生有過及疾病者放歸為民

凡樂舞生每歲所給米麥衣布及時節賞賜之數具刻於御製碑陰

凡遇朝會本觀提點班在僧錄司左善世之下道錄司正一之上知觀班列於僧錄司左覺義之上道錄司左至靈之下

凡樂舞儀節本寺令協律郎等官教習每遇祭祀先期於本觀演習

凡大祀天地

樂麾協律郎一員

樂生七十二人

文舞生六十四人

引舞二人

武舞生六十四人
引舞二人

執事一百二十三人

典儀一人
傳贊五人

通贊二人
壘洗八人

正殿四壇捧帛四人
執爵四人

司尊三人

內垣四壇捧帛等共十六人

外垣二十壇捧帛等八十人

燒香共六十八人

點燭共十二人

凡時享太廟舉麾樂舞生皆同前

執事六十三人

典儀一人

通贊一人

正九壇捧帛九人

執爵十七人

司尊二人

親王四壇捧帛四人

斟酒四人

功臣十六壇捧帛十六人

斟酒四人

五祀捧帛等五人

燒香共六人

歲暮祫祭捧帛添一人

執爵添二人

餘同前

五祀執事十二人

贊引一人

讀祝一人

捧帛五人

執爵五人

司尊一人

旗纛執事五人

贊引一人

讀祝一人

捧帛一人

執爵一人

司尊一人

燒香共六人

凡祭社稷舉麾樂舞生同前

執事十二人

典儀一人

通贊一人

正四壇捧帛四人

執爵四人

司尊二人

燒香共十人

凡祭先師孔子舉麾樂舞生同前

執事三十二人

典儀一人

通贊一人

壘洗三人

對引一人

正一壇捧帛一人

執爵一人

司尊一人

四配四壇捧帛四人

執爵四人

十哲二壇贊引二人

捧帛二人

執爵二人

司尊二人

東西二廡贊引二人 捧帛二人

執爵二人 司尊二人

燒香共三人

凡樂舞生執事人等歲用米麥等物俱從戶部撥送本

觀收貯

米二千六百石 麥六百石

豆一百六十石 芝麻三十石

鹽三千斤 柴二十五萬斤

月支米一百九十三石三斗八升共支米二千三百七十六石各陵寢時祭每歲共支行糧熟米一十五石五斗二升文廟春秋二祭每名支行糧熟米一升共三石五斗六升每歲正旦中元冬至三節每名支米一斗五升共九十石每歲支過外餘米作閏月并急差支用

凡樂舞生歲給淨衣并布絹鈔貫等物天地壇登壇淨衣每名一套計四百七套社稷壇登壇淨衣每名一套計二百二十六套每套俱計四件每名鈔二貫計四千

八百五十九貫每名夏布三疋棉布三疋生絹一疋白
綿半斤

凡本觀原額膳夫三十名俱順天府屬縣點充

南京神樂觀

事例

凡每年本觀樂舞生三百五十名該用綿布一千五十
疋絹三百五十疋綿一百七十五斤闕太常寺奏行南
京戶部轉行甲字等庫關支該用鹽三千斤柴一十五

萬五千四百斤南京戶部工部關支該用秋糧米二千
石小麥六百石黃豆一百六十石芝麻三十石碾米牛
用稻草一千五百包直隸常州等府武進等縣進納
凡本觀原額膳夫三十名俱應天府屬縣點充

明會典卷一百七十八